

erano con lui, deliberò ritirarse in el ditto suo castelo de Karak con zerca 6000 persone. Poi soprasonse el dicto Mechemet con l'antiguardia dil Turco; el qual inteso a Damasco che el prefato signor Gazeli era scampato, se mise a seguirlo con 2000 cavali electi; *tamen* andò a la volta de certi boschi, credendo che 'l fosse scampato in quelli, et non fu trovato, perchè l' andò a la volta dil prefato castelo Karak, dove el se ritrova fina el di presente, havendo lassato il castelo di Damasco ben munito con zerca 300 persone. Et turchi poi introno in Damasco portando de le teste de li compagni de Macarea rimasti morti a Chara, demonstrando haver facto gran victoria, et mandando di quelle in Aleppo et verso la Anatolia, justa il solito loro, per dar voce che l'aveva facto la zornata con el signor Gazeli et che l'havevano morto con molti homeni da conto; *tamen* ancora de dicti compagni di Macarea, non erano stà morti oltra 200, et molti di loro turchi. Da poi, per essi turchi fono facte le cride in Damasco che havevano per amici tutti excepto quelli che erano nel castelo; overo che li dava ajuto et favore; *tandem* per do zorni da poi che il signor Gazeli abandonò Damasco, li amici di quello comenzorno soprazonzer, et admoniti che el paese era de' turchi, tutti se ne sono retirati a casa loro. Dice che *etiam* Caitbey Begelin, *olim* diodar del qu. Tomom bei soldan, qual se trova in cavo del Sait scampato dal Cayro quando fu perso con 15 milia tra mamaluchi et fioli de mamaluchi, se aveva offerto de venir in ajuto de esso signor Gazeli in caso che lui li volesse favorir, et con el signor Sophis averli per recomandati. Et questo disse esser la verità del tutto, per esser lui Cassan come famigliar de l'emir Jeie capo de Drusi intravenuto a tutte dicte cose *cum* el suo patron; el qual ha saputo sì ben a parlar *cum* turchi, che el tien el suo paese sopra de Baruto quietamente come amico de l' una et l'altra parte, et fu quello che fece tajar a pezi li francesi a Baruto in questo autumno.

*A dì 22 dicto.*

Antonio Cassan, patron di grippo qui di Famagosta, qual parti da Limissò Sabato di nove dil presente con uno cargo di sale et 8 peregrini per il Zapho, nel qual loco essendo arivato a dì 13 dicto, desmontò in terra, dove per uno chiamato Barchiet guardian de le marine suo amico, li fu ditto che 'l non dovesse descargar nè meter li peregrini in terra per cosa del mondo, perchè tutto el paese era

in gran confusion, perchè el signor Cayrbeeh se atrovava apresso Hierusalem con circa 5000 persone, el qual aveva remesso uno signor in Hierusalem, uno in Rama et uno in Gazara, et de li doveva partir a dì 16 per andar a la volta de Damasco; et che per el paese le strade erano rote sì da turchi de mal afar, come da' arabi, i quali andavano a la roba de chi manco poteva. Et che el signor Gazeli se atrovava in uno suo castelo chiamato Karak, posto sopra una roca et uno saxo molto eminente, fortificato per lui et fornito di victuarie per quatro anni, dove l'aveva da 5000 persone; et poco distante da quello per una zornata, erano do capi de le zente arabe chiamate quelli de Penilan con 70 in 90 milia persone tutte a cavallo de cavale velocissime per custodia del paese ad instantia del prefato signor Gazeli, el qual non lassava si facesse movimento alcuno, ma stava in aspectation del signor Sophis, qual li aveva scripto excusandose molto de le gran neve et fiumare non lo avevano lassato venir sì presto come era il bisogno; et che a la più longa, a mezo dil mese di April proximo saria ne la Soria potentissimo. Et hali narato la certa causa del scampar del signor Gazeli da Damasco esser stata, perchè, essendo a la impresa di Aleppo con lo exercito, 4 capi arabi par si movevano lentamente et disturbavano che *etiam* li altri tardasseno; et perchè fono *etiam* causa, solo specie che le zente non potevano tolerar li fredri sotto Aleppo, che 'l ditto Signor se retraesse in Aman, vete suspecta la loro fede, credendo *etiam* che remanendo lui solò capo tutti dovesseno seguirlo; per il che secretamente li fece morir tutti quatro. Et vedendo poi quando si volse mover *cum* lo exercito, che per mancamento de' dicti capi li loro subditi fugivano, deliberò fuggendo salvarsi la vita; et cussì el se redusse in Damasco, et de li poi nel dito castelo di Karak, dove certo è per dimorar fino a la venuta dil signor Sophis. *Præterea* reporta che, havendo mandato uno suo marinaro verso Hierusalem per aver, *etiam* per altra via, notitia de le cose predite, tanto erano desiderosi li peregrini di proseguir il loro viazo, esso marinaro li ha confirmato tutte le cose predite secundo che li erano state narate da do frati di San Francesco ritrovati a Rama, quali li persuase a ritornar et referir a li peregrini et esso patron, che se avevano cara la vita dovesseno ritornar in Cypro, che certo andando più avanti, overo escaricando, peririano; subjungendo che ancora loro frati erano in grande angustie per amor del signor Gazeli, et che 'l loro padre guardian era stà impre-